

"AMIGOS DE COLOMBIA" A CELEBRA INDEPENDENCIA DI COLOMBIA

ORANJESTAD (APA) ---

Na ocasion di celebracion di e di 179 aniversario di Independencia di Colombia (cu pa motibo di luto nacional no por a worde celebrá dia 20 di Juli último), Sr. Ramon Todd-Dandaré, Presidente di e Asociacion "Amigos de Colombia" a pronunciar un discurso, for di cual nos ta trece e partinan mas importante.

Na inicio di su discurso, Todd-Dandaré a bisa, cu por lo general hendenan ta kere, cu independencia di e repùblicanan hispano-americanu tin su origen den e revolucion Frances, cu recientemente a cumpli su bicentenario (200 aña). Pero ta bon pa bisa, cu e independencia di Colombia

a nace na 1781, ora cu na Socorro, e promé revuelta serio a tuma lugar contra e autoridadnan colonial, revuelta cu a haya e nomber di "Levantamiento de los Comuneros" y cu a conocé como héroe, José Antonio Galán y cu e revolucion Frances, cu su lema "Libertad, Igualdad y Fraternidad", realmente a duna ánimo y forza na e ideanan vigente n'e banda di océano aki, contra e sistema colonial.

Historia a sigui su curso y ta na 1810, dia 20 di Juli, un grupo rebelde a baha e Virrey Antonio Amar y Borbón y ta apoderá di Santa Fè de Bogotá den nomber di e Rey Spañol Fernando Séptimo, kende na e momentonan ey tabata prisionero di Napoleón. Exigencia di e hunta rebelde tabata, cu Rey Fernando mester a blaha pa Bogotá pa ehercé e mando. Esaki ta e historia real di e independencia di Colombia, cu a yega



na su berdadero realizacion ora cu e gran Simon Bolívar, hunto cu prócer nan manera Santander, Sucre y tanto otronan, a seya esaki dia 7 di Agosto di 1819, derrotando e ejército realista comandá pa e Brigadier José María Barreiro, pegá cu e brug di Boyacá.

E idea primordial di Bolívar tabata pa uni henter e parti di America cu ta keda pazuid di Rio Bravo, un union cu - manera e mes a bisa - cu lo no a cal for di cielo, sino dor di esfuerzonan bon dirigi. Dia 17 di December 1819, e Congreso di Angostura a aprobá unánimamente e ley cu a crea República di Colombia. Su creacion tabata cuadra cu e ideanan di Bolívar, cu e tempo ey caba a visualizá un futuro próspero pa Colombia. Den e Carta di Jamaica di aña 1815 ya e libertador e bisa: "Mi ta deseá mas cu ningun hende, mira formá na America, e nacion mas grandi na mundo, menos pa su extension y riquezanan, cu pa su libertad y gloria".

Bolívar, manera e gran escritor Colombiano Gabriel García-Marquez ta describi den su obra "El General en su laberinto", pa su origen y espíritu, tabata un homber di Caribe, e Caribe cu ta uni nos pa su awanan blauw y su historia contradictorio. No solamente a lucha hunto cu Bolívar den e awanan blauw di Caribe, hombernan grandi manera Luis Brion y José Prudencio Padilla, sino cu cada bes cu e libertador tabata sinti menazá riba tera, tabata busca refugio sea na Corsow, sea na Jamaica - unda pa poco el a perde su bida - of na Haiti, cu a yudé, mediante su Presidente Alejandro Pétion, kende a ofrecé

4 batayon di negros, bao e conditien, cu el a cumpli cuné asina el a yega bek Venezuela, esta, garantizá libertad pa tur esclavo, pa medio di un proclamacion lanzá na Ocumare na Juli di 1816.

Bolívar no solamente tabata busca union di e paisnan, sino tambe e integracion di e pueblonan, e integracion cu nos mester sigui busca te ora e bira realidad. Esaki ta e integracion cu nos mester sigui busca pa Aruba y Colombia tambe, mescos cu pa tur e pueblonan di Caribe y di America Bolivariano. Na memoria die idea Bolivariano, na memoria di e ideal di e inmortal Arubiano, eminente conocedor di e ideanan di Bolívar, Gilberto Francois Croes, ta urgí e gobiernonan di Aruba y di Colombia, pa haci e union aki bira realidad. Pa cumpli cu e integracion aki, pa den futuro, nos por marcha hunto manera ruman, cu e demas paisnan di Caribe y America Latino.

Finalizando su elocuente discurso, pronunciá na ocasion di un ofrenda floral cu a tuma lugar ayera mainta riba Plaza Bolívar, Ramón Todd-Dandaré a haci un apelacion fuerte riba gobièrno di Colombia, pa reconsiderá e reapertura di su Consulado na Aruba y a urgí gobièrno di Aruba, pa busca un relacion cu Colombia di berdadero pueblonan ruman, manera semper nos tabata y lo sigui ta den futuro.

N.B.

Den nos edicion di Dialuna nos lo trece un relato di e parti cultural y e fiesta bailable cu a tuma lugar den oranan di' anochi, como culminacion di e fecha conmemorativo, cu Asociacion "Amigos de Colombia" a organizá na Aruba.

